

SIMAR satisfecho despues di reunion cu formador Eman

Atencion pa enseñansa ta punto clave

ORANJESTAD (AAN): Henter e siman aki formador Mike Eman y su team ta ricibi delegacionnan di diferente sector den cuadro di formacion di un Gobierno nobo, despues di e eleccionnan parlamentario 27 di september ultimo cu a duna e partido di Eman mandato pa sigui goberna.

Formador Eman ta topa cu institucionnan gubernamental, semi-gubernamental, priva y gremionan sindical. Un di e sindicatonan cu a reuni cu formador y su team diaranson atardi tabata SIMAR, sindicato di Enseñansa, representa pa Natalie Carlo, miembro di e directiva.

“E reunion a bay bon,” Carlo a indica na final. “Nos a haya bon informacion di Minister Presidente y esaki tabata un bon oportunidad pa SIMAR trece su preocupacionnan dilanti y puntonan cu nos ta kere cu e Gobierno nobo mester bay tene cuenta cu nan.” SIMAR ta contento cu e tipo di consultanan aki y e reaccion cu a ricibi di formador. Principalmente tabata importante cu Eman a bisa cu lo sigui cu Dialogo Social y sigur riba e parti di Enseñansa cu no a caba cu e discusionnan ainda.

Formador a pidi e sindicato

pa tene cuenta cu e plan nobo di gobernacion pa loke ta restructuracion salarial di e cuerpo di docente, seguridad, cuido y formacion di e maestronan. Banda di esaki SIMAR tin un preocupacion grandi cu 35% di e poblacion ta riba un nivel hopi bou di conocimiento (estudio). A pidi pa e Gobierno nobo haci un investigacion riba e punto specifico aki y despues mira con por sinta na mesa y busca forma pa cambia e cifra aki. Si den e prome Gabinete Mike Eman hopi atencion a worde dedica na structura di enseñansa, renobacion di e schoolnan, den e siguiente gabinete enfasis ta bay worde poni riba formacion, contenido, material y curriculum. Masha importante tambe ta cu tur fundacion cu ta atende cu e diferente tipo di enseñansa ta worde trata di e mesun forma. “Esaki pa evita cu tin discrepancia entre e schoolnan,” señora Natalie Carlo a señala. Renobacion di e edificionan di school lo sigui bou di e gobierno nobo. Apesar di hopi trabao cu a worde haci riba e tereno aki den e ultimo cuatro añanan, ainda, segun SIMAR, tin hopi school, tanto onderbouw como secundario cu ta pendiente pa haya un “facelift”.

